

**PEMBERITAHUAN PERTANYAAN BAGI JAWAB LISAN**  
**DEWAN RAKYAT MALAYSIA**

**PERTANYAAN : JAWAB LISAN**

**DARIPADA : TAN SRI DATUK SERI PANGLIMA HAJI  
ANNUAR BIN HAJI MUSA [ KETEREH ]**

**TARIKH : 17 JULAI 2019**

**SOALAN**

**Tan Sri Datuk Seri Panglima Haji Annuar bin Haji Musa [ Ketereh ]** minta **MENTERI LUAR NEGERI** menyatakan apakah pendirian berkaitan dasar mengenai penggunaan bahasa perwakilan Malaysia di Sidang Antarabangsa.

**JAWAPAN**

Tuan Yang di-Pertua,

Saya ingin mengucapkan terima kasih kepada Yang Berhormat Ketereh atas keprihatinan serta pertanyaan yang dikemukakan tentang dasar penggunaan bahasa perwakilan Malaysia pada sidang antarabangsa.

Tuan Yang di-Pertua,

2. Saya ingin menjawab persoalan tersebut dari dua sudut pandang yang berbeza. Pertamanya, selaku salah satu agensi pusat Kerajaan, sudah semestinya menjadi tanggungjawab Kementerian Luar Negeri untuk turut sama menyokong usaha untuk memartabatkan bahasa Melayu selari dengan maksud dan kehendak yang termaktub di dalam Perkara 152 Perlembagaan Persekutuan. Saya percaya ia adalah satu perkara yang tidak perlu dipertikaikan oleh mana-mana pihak.

3. Meski pun penglibatan pegawai-pegawai Kementerian Luar Negeri di pelbagai sidang antarabangsa menagih penggunaan Bahasa Inggeris secara meluas, mereka digalakkan untuk menyelitkan penggunaan bahasa

Melayu di pentas antarabangsa mengikut kesesuaian, seperti memulakan ucapan dengan salam sejahtera, mengucapkan terima kasih mahu pun menggunakan bidalan atau peribahasa yang bersetujuan dengan konteks di dalam ucapan atau pun kenyataan umum yang dibuat. Mudah-mudahan usaha kecil ini akan membuka peluang kepada negara lain untuk mengenal bahasa kebangsaan Malaysia.

4. Untuk makluman Dewan yang mulia ini, Kerangka Dasar Luar Malaysia Baharu yang bakal dilancarkan sedikit masa lagi turut menyelitkan elemen keunikan tamadun dan dunia melayu di mana ia boleh dilihat sebagai inisiatif di peringkat Kementerian untuk mendukung semangat yang tersirat di dalam Perkara 152 Perlembagaan Persekutuan. Kerangka tersebut menzahirkan iltizam serta hala tuju yang akan memberi panduan kepada pegawai-pegawai Kementerian di dalam menjalankan tugas mereka sewaktu berada di luar negara.

Tuan Yang di-Pertua,

5. Dari sudut pandang yang kedua pula, Kementerian Luar Negeri akur bahawa Bahasa Inggeris telah lama diterima sebagai bahasa komunikasi di pentas antarabangsa. Di peringkat Pertubuhan Bangsa-Bangsa Bersatu, terdapat enam bahasa yang digunakan sebagai bahasa rasmi iaitu Bahasa Inggeris, Bahasa Arab, Bahasa Perancis, Bahasa Sepanyol, Bahasa Rusia serta Bahasa Mandarin.

6. Justeru, Kementerian Luar Negeri turut menggalakkan penguasaan bahasa ketiga seperti bahasa Arab, Mandarin, Perancis, Rusia, dan Sepanyol di kalangan pegawai Kerajaan yang akan bertugas di luar negara dengan harapan kemahiran berbahasa itu dapat mempertingkatkan daya saing Malaysia di persada antarabangsa.

7. Perkembangan teknologi yang sangat pantas serta kebergantungan yang tinggi ke atas bahasa Inggeris untuk memahami perkembangan teknologi terkini menyebabkan kita tidak dapat lari dari terus berusaha untuk meningkatkan penguasaan bahasa tersebut agar kita kekal relevan dan berdaya saing dengan negara lain termasuklah juga di dalam konteks dunia diplomatik.

Tuan Yang di-Pertua,

8. Penggunaan bahasa sebagai wadah untuk mengembangkan ilmu amatlah dekat di hati saya. Selaku Menteri yang mengemudi Kementerian Luar Negeri, saya turut memainkan peranan tersendiri untuk mempromosi serta menyebarluaskan lagi penggunaan bahasa kebangsaan kita termasuk dengan menjalin kerjasama dengan Kementerian serta badan yang lain. Di antara inisiatif yang telah saya laksanakan adalah seperti berikut:

- (a) berbincang dengan Dewan Bahasa dan Pustaka tentang pengantarabangsaan Bahasa Melayu;
- (b) bekerjasama dengan Kementerian Pendidikan untuk memperhebatkan lagi program '*Education Malaysia*' yang mengetengahkan bahasa dan budaya di peringkat antarabangsa;
- (c) memperkenal dan mempromosikan bahasa Melayu di kalangan diplomat asing di Malaysia melalui Institut Diplomasi dan Hubungan Luar Negeri (IDFR);
- (d) mengedarkan buku-buku terbitan Malaysia sebagai cenderamata rasmi kepada tetamu atau perwakilan asing dalam usaha memperkenalkan Bahasa Melayu;
- (e) menyokong dan terus berusaha dalam memperkasakan bahasa Melayu sebagai salah satu bahasa utama pada peringkat ASEAN dan antarabangsa; dan
- (f) terbaru, meraikan para perwakilan Sidang Ke-58 Majlis Bahasa Brunei-Indonesia-Malaysia (MABBIM) di dalam satu majlis makan malam di Wisma Putra.

Sekian, terima kasih.